

## Hamaarā Paḍosī Kaun Hai?

**Injeel : Luqaas 10:25-37**

Ek din, qaanun paḍhaane waale ek ustaad ne Īsā<sup>(a.s)</sup> ko āzmaane ke liye unse puchā, “Maiñ aisā kyā karuñ ki mujhe kabhī nā kḥatm hone waalī ziñdagī mile?”<sup>(25)</sup>

Īsā<sup>(a.s)</sup> ne use jawaab diyā, “Qaanun me kyā likhā hai? Tumne is baare me kyā paḍhā?”<sup>(26)</sup>

Us ādmī ne jawaab diyā, “‘Tum apne rab, Allaah taa’alā se muhabbat karo. Tum use apne pure dil, dimaag, apnī ruh, aur apnī purī taaqat se pyaar karo.’ Aur, ‘Tum apne paḍosī se utnī hī muhabbat karo jitnī tum apne āp se karte ho.’”<sup>(27)</sup>

Īsā<sup>(a.s)</sup> ne kahā, “Tumhaarā jawaab bilkul ḥeek hai. Tum agar ye karoge to tumko ziñdagī milegī.”<sup>(28)</sup> Lekin wo ādmī apnī ziñdagī guzaarne ke tareeqe ko badalnā naheen chaahtā thā. Islie usne Īsā<sup>(a.s)</sup> se kahā, “Aur merā paḍosī kaun hai?”<sup>(29)</sup>

Us sawaal kā jawaab dene ke liye, Īsā<sup>(a.s)</sup> ne kahā, “Ek ādmī Yerushalam se nikal kar Areeḳḥā naam ke ek shahar kī taraf jā rahā hai aur use raaste me kuch luṭere luṭ lete haiñ. Wo usko maarte haiñ aur uske kapḍe phaaḍ dete haiñ. Wo luṭere usko zaḳḥmī kar ke wahaan se chale jaate haiñ.”<sup>(30)</sup>

“Ittefaaq se ek Ibraanī imaam bhī usī raaste se guzar rahā thā. Jab imaam ne us ādmī ko dekhā to apnā raastā badal liyā aur saḍak ke dusrī taraf chalne lagā.”<sup>(31)</sup> Uske baad [Musā<sup>(a.s)</sup> ke qabeele] Laawī qabeele ke ek ādmī bhī wahaan se guzrā. Wo us zaḳḥmī ādmī ko dekhne uske paas tak gayā lekin wo bhī saḍak kī dusrī taraf chalā gayā.”<sup>(32)</sup>

“Tab wahaan ek Saamrī ādmī āyā [jisako Ibraanī log neechī nazar se dekhte the]. Wo Saamrī us jagah pahuñchā jahaan wo zaḳḥmī ādmī paḍā huā thā. Usne jab us ādmī ko dekhā to usko bahut afsos huā.”<sup>(33)</sup> Us Saamrī ādmī ne us zaḳḥmī ādmī ke zaḳḥm ko saaf kar ke paṭṭī baañdhī. Usko apne gadhe par biṭhaayā aur ek saraae me le gayā. Wahaan le jā kar uskī dekhbhaal karī.”<sup>(34)</sup> Dusre din us Saamrī ādmī ne saraae ke maalik ko do chaañdī ke sikke die aur kahā, ‘Is ādmī kā kḥyaal rakhnā aur agar iskī dekhbhaal me kuch zyaadā kḥarch ho jaae to maiñ aglī baar ā kar de duñgā.’”<sup>(35)</sup>

Īsā<sup>(a.s)</sup> ne puchā, “Tumheñ kyā lagtā hai ki in teen logon me se kaun sā ādmī us zaḳḥmī ādmī kā paḍosī hai?”<sup>(36)</sup>

Qaanun ke maahir ne jawaab diyā, “Jisne uskī madad karī.” Īsā<sup>(a.s)</sup> ne us se kahā, “To tum bhī wahī karo jo us ādmī ne kiyā hai!”<sup>(37)</sup>